

## ISCARTA NAJ SAN PABLO YATO TET NAJ FILEMÓN

*Yichebanil iscarta naj Pablo*

<sup>1</sup> Hanin Pablo inti'an, ayinicojan preso yu walnic'ojan Istzotí Comam Jesucristo.

Haninan yeb juxta Timoteo chicotz'ibñetojañ hune' carta ti' tawet wuxta Filemón; xahan ayach juhañ, jetipaxo coba yiñ ismunil Comam Dios.

<sup>2</sup> Chicotz'ibñepaxtojañ tet ix janab Apia, yebpaxo tet naj juxta Arquipo, naj caw colwa jiñarñ yiñ ismunil Comam Dios, yeb tet sunil mac ayxaco yul isk'ab Comam Dios chiscutxba isba bey hawatut.

<sup>3</sup> Ha'ojab Comam Dios Mame, yeb Comam Jesucristo Jahawil chiak'ni isc'ulch'anil isc'ul, yeb ak'anc'ulal teyet.

*Isc'ulch'anil isc'ul naj Filemón yeb caw ayco yanma naj yiñ Comam Dios*

<sup>4</sup> Yet chintxahlihan tet Comam Dios hunta el, chañinnatijan, chiwak'nihan yuch'andiosal tawin tet Comam. <sup>5</sup> Yuto xawabehan tato caw xahan chawil macta yetxa Comam yehi, yeb ta caw ayco hawanma yiñ Comam Jesús. <sup>6</sup> Caw chink'anán tet Comam Dios ta ha' anma xayaco isba yul isk'ab Comam Jesucristo, yu chila ta ayco hawanma yiñ Comam Dios, caw chistxumiloj tato hañc'añe Comam Jesucristo chiak'ni isc'ulal jet. <sup>7</sup> Wuxtaj, caw chintzalahan yeb xin caw chiyik' yip wanmahan

yu isc'ulch'anil hac'ul, yuto hawu yuxin xaischah  
macta yetxa Comam Dios yak'llobal yanma.

*Tzoteldo naj Pablo yiñ naj Onésimo tet naj  
Filemón*

<sup>8</sup> Haninti'an ischejab Comam Jesucristo wehan, yuxin chu walnihan tawet baytet caw yilal hawatx'eni. <sup>9</sup> Yaja' haca' chu yay cosat cok'anni hunu tzet ye tu', hac tu' chu walnitajan tawet, yuto caw xahan ayach wuhan. Hanin Pablo inti'an icham inxahan, caw xin ayinicojan preso yu chiwalic'ojan Istzoti' Comam Jesucristo. <sup>10</sup> Caw chinocan ink'ana'an tawet yiñ naj Onésimo, naj ti' haca'tañe inc'aholan ye naj, yuto ischah naj Comam Jesucristo yul yanma yet ayinicojan preso ti'.

<sup>11</sup> Naj Onésimo ti',\* haca' hunu chejab caw matzet chiocnicoj, hac tu' ye naj hawu yet yalaritocanoj, yaja' wal tinañ xin caw chiocnoco naj hawu, haca' yu yocnico naj wuhan bey ti'. <sup>12</sup> Wal tinañ chiwatojan naj tac'atañ hunelxa, c'ul chu hachahni naj, haca'ojtam haninan chinhachahan. <sup>13</sup> Wochebalan chicancano naj inc'atañian yu inchejnihuan naj, ha'ojtam xin hach chachinchejan selelo naj yulbal ayinictijan yul preso ti' yu Tzoti' c'ul yet colbanile. <sup>14</sup> Yaja' mach chisje inc'ulan inwatx'ehan hunu tzet ye tu' yalañto mañto chiwabehan tzet chawute hawalni, haxinwal hune' chink'anan tawet ti' machojab lañbiloj, wal xin yiñojab hawanma chitita.

---

\* **1:11** Hune' bihe Onésimo chal yelapnoj: chiocnicoj.

**15** Naj Onésimo ti', el naj hanic' tiempohal tac'atañ, yaja' yuñe ismeltzo naj tac'atañ yiñ hunelñe. **16** Yaja' matxa haca'o hunu chejab chuco naj, wal xin caw nimanojab yelapno naj yul hasat, haca' hunu juxta caw ochebil ju. Walinan caw xahan ay naj wuhan bey ti', walachpaxo xin, ec'nahojab xahan chawil naj. Machrieojabtaj yu jet anmahil naj yuxin xahan chawil naj, walxinto yu juxtaxa naj yiñ Comam Jesucristo.

**17** Yuxin ta caw juxtaxa coba yiñ Comam chawabe, chah naj hacojtam haninan chinapnihan tac'atañ. **18** Tato ay hunu istx'ojal iswatx'e naj tawiñ, maca ta ay isc'as naj tawet, teye wetan. **19** Hanin Pablo inti'an han-caw-inan chintz'ibñetojan, tato ay isc'as naj tawet haninan chintohlahan, waxañca xin chinnatijan tawet tato aypaxo hac'as wetan, yuto haninan walan Istzotí' Comam Jesucristo tawet yet hachahni Comam yul hawanma. **20** Hach wuxtaj yije tzet chink'anan tawet ti', yuto yuninalxa Comam Dios hawehi. Ak' yak'lotal wanmahan, yuto juxtaxa coba yiñ Comam Jesucristo.

**21** Chintz'ibñetojan hunték'an ti' tawet yuto wohtajan tato caw yijemach, caw wohtapaxo-jan tato ec'balto tzet chayije yibañ tzet chiwaltotí'an. **22** Chiwalnipaxtojan tawet, chasay nino bay chinehan yet chinapnihan texol. Caw xin chiwacojan yipo wanmahan ta yu chektxahli wiñan tet Comam Dios, chiel yiñ isc'ul Comam intohan quexwilnojan.

*Islahobal iscarta naj Pablo*

<sup>23</sup> Chaldo naj juxta Epafras ta chawil haba bey tu', ayco naj preso wintajan bey ti'yu yalnipaxic'o naj Istzotí' Comam Jesucristo. <sup>24</sup> Chalpaxto juxta Marcos, juxta Aristarco, juxta Demas yeb juxta Lucas ta cheyil heba bey tu'; ebnaj ti' wet munlawomalan yin̄ ismunil Comam Dios.

<sup>25</sup> Ha'ojab Comam Jesucristo Jahawil chianayo isc'ulch'anil isc'ul teyibañ bey tu'.

# **Nuevo Testamento yin abxubal New Testament in Jakalteko Eastern; jac (GT:jac:Jakalteko)**

copyright © 1997 Wycliffe Bible Translators, Inc.

Language: Jakalteko

Translation by: Wycliffe Bible Translators, Inc.

## **Copyright Information**

© 1997, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

## **The New Testament**

in Jakalteko

**© 1997, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
b5bce385-9ed7-5701-9edc-e221ef239a1c